



Jumat, 30 Juni 2023
Ogen : Rut 4:13-22



Ngangkip Kempu



Kesangapen si mbelin kal man orang tua si ngidah kempu-kempuna. Kempu e jadi tambar dengen maba kemalemnate. Nini ras bulang usur ikatken jadi singiani kempu. Kempu e mereken semangat mbaru dengen nambahi gegeh man orang tua.

Lanai langlang riahna ukur Naomi i bas ketubuhen kempuna. Kenca Boas muat Rut jadi ndeharana, ipasu-pasu Dibata dengen ibereken me tuah ku bas jabuna. Rehen enterem jelma janah nina man Naomi; terpujilah Dibata sabap iberekenna kempu man Naomi, rikut ras bermain si tuhu-tuhu engkeleng ia. Kempu e jadi penampat, mereken kegeluhen si mbaru dengen ketenengen. Enda me kemalemnate sinialoken Naomi i bas kinituanna. Enggo melala sinidalanina, subuk kalak tandang, kematen perbulangen, kematen anak-anakna bage pe ngeluh jadi kalak musil. Perbeben enda seh beratna, tapi tetap idalanina. Kepeken i bas paksana ipejumpaken Dibata me Rut (permenna) ras Boas, janah keleng kel ate Boas man bana. Piah dungna salih me kecedan ate jadi kesangapen man Naomi. Kesangapen e igejapken Naomi i bas geluhna. Malem kel atena, isampati Dibata kel ia dengen teneng kel akapna bas ketubuhen kempuna e. Selaku nini, ipekena-kenana dengen iangkipna me kempuna e. Idoah didongkenna gelah lampas mbelin lampas gedang. Bagenda me turi-turin kegeluhen Naomi.

Kesangapen Naomi jadi min kesangapenta selaku Moria, melala perbeben si enggo idalani entah paksa idalani. I bas kerina e pebelin pengarapen, ernalem man Tuhan saja, sabap paksana siangkip me kemalemnate e.